

Ester rekokue oĩa Ester rekokue oĩa

Judeu kuery pavẽ e'ŷ ojevy raka'e Judá yvy re. Heta ete opyta Babilônia ha'e Pérsia yvy re. Ha'e va'e kuery regua ma Ester oiko raka'e, Pérsia regua Susã tetã py.

Ester ma kunha iporã ete va'e ramo huvixave oguerovy'a vy ogueraa gua'yxyrã. Ha'e rami rã oendu omombe'ua rã peteĩ ava heko vai va'e Hamã hery va'e judeu kuery ha'e javive ojuka ukaxe. Huvixa eteve voi ixupe ojuka uka, ndoikuuaai vy gua'yxy Ester ae judeu oikoa. Ha'e nunga Ester oikuaa vy huvixa renonde ojerure guetarã kuery ogueraa jepe aguã re. Jeayvuveikue'i py e'ŷ ojerure huvixa pe, guenonde py noenoĩ ramo. Ha'e rami teĩ Ester mongakuaare aipoe'i uka ixupe: "Huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa teĩ. Mba'eta ha'e rami ete oiko taa ára rekyrirĩ ri ramo amboae henda gui ju 'rã oiko judeu kuery pytyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhiã ha'e rami aguã ae nemoĩa raka'e huvixa ra'yxyrã" he'i uka. Ester ombovai: "Tereo ha'vy, emboatypa judeu kuery Susã tetã py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ŷ re avi 'rã orekuai. Ha'e va'e rire ma aa 'rã huvixa oĩa py, lei oĩ va'e rovai teĩ ae ma. Xapy'a rei xejukaa aguã rami ri rã amano 'rã", he'i (4.13-16).

Huvixa renonde py Ester ou ramo omovaẽ porã, ojapo guive ojerureague. Ha'e rami rã judeu kuery ndojukaaai raka'e. Ojukaa va'e ma ijukaxeare kuery anho. Ha'e rami

rã judeu kuery ov'y'a vaipa okuapy, Nhanderuete ogueraa jepe ramo.

Huvixa Assuero ngaru tuvixa va'e ojapoague

¹ Huvixa Assuero ma Índia guive Etiópia peve opena oikovy cento e vinte e sete yvy oĩ va'e re. Ha'e va'e jave py

² huvixa Assuero tenda openaaty áry oguapy oiny Susã tetã py oo yvateve va'e oĩ va'e py.

³ Mboapy ma'etýa re ma huvixa oĩ jave ojapo peteĩ ngaru ojeupegua kuery yvatekueve ha'e guembiguai kuery ha'e javi pe. Ha'e kuery ma Pérsia ha'e Média pygua ipo'akave va'e. Ha'e ramo yvatekueve ha'e hembiguai kuery yvy ikuai va'e re opena va'e oupa vy henonde ikuai.

⁴ Ha'e kuery pe huvixa oexa uka iporãgueve ha'e hep-ykueve openaa rupi oguereco va'e, yvate ete va'e vy iporãa guive. Heta ára ma ikuai, cento e oitenta ára peve.

⁵ Ha'e gui ha'e va'e ára opa ma rire huvixa ojapo peteĩ ngaru tuvixa va'e. Susã tetã py oo yvateve va'e oĩ va'e py ojapo tetã pygua kuery ha'e javi pe, yvatekueve ha'e yvyigueve pe guive. Sete ára re ojapo ngoka py yvotyty oĩ va'e py.

⁶ Ha'e py ma omoña ajukue xiñ ipererí'i va'e ha'e púrpura regua, ixã ipererí'i va'e ha'e púrpura py ojokua pyre. Ha'e va'e ma inhapyí va'e prata guigua re ojokuaa, oo yta ita alabastro guigua hi'aí va'e re guive. Tenda ikuai va'e ma ouro ha'e prata guigua py ombojeguaa. Pyrõa ma ita xiñ, mármore, alabastro ha'e ita iporãve va'e guigua anho.

⁷ Ha'e kuery oy'u aguã ogueru ruka karo ouro guigua joegua e'ŷ-e'ŷ py. Heta avi oĩ vinho huvixa pegua anho rei, huvixa ome'ëxeal'i py ome'ë va'ekue.

⁸ Ha'e ramo huvixa oipotaa rami vy ha'e kuery oy'uxea rami oy'u okuapy, mba'eta ngoo rupi opena va'e kuery

ha'e javi pe huvixa ijayvu peteĩ-teĩ oy'uxea rami ome'ẽ aguã re.

⁹ Huvixa Assuero ro py ta'yxy Vasti voi ojapo avi ngaru tuvixa va'e kunhague pegua anho.

Ngarua py huvixa ra'yxy Vasti ndouxeiague

¹⁰ Sete araa py huvixa opy'a re vinho gui ovy'a anho rei. Ha'e rami vy ijayvu guembiguai kuery Meumã, Bizta, Harbona, Bigtá, Abagta, Zetar ha'e Carcas pe. Ha'e va'e avakue sete-ve va'e ma eunuco meme ikuai huvixa Assuero renonde rupi ombo'eapo va'e.

¹¹ Ha'e va'e kuery pe huvixa ijayvu henonde py ogueru aguã ta'yxy Vasti akã regua reve, iporã ete ramo amboae regua kuery ha'e yvatekueve ikuai va'e ha'e javi oexa aguã.

¹² Ha'e rami teĩ huvixa ra'yxy Vasti ma sete-ve eunuco kuery ijayvua rami e'ŷ ndouxei, huvixa ayvu ae ha'e kuery omombe'u teĩ. Ha'e rami rã huvixa oendu vy ojou vai, ipoxy vaipa guive.

¹³ Ha'e gui ma huvixa oporandu hi'arandu va'e kuery ára nhavõ mba'emo oikuua porã va'e pe, (mba'eta ha'e rami ae 'rã huvixa oikuua pota uka lei oña rami oikuapa va'e kuery pe.

¹⁴ Ha'e va'e regua irũ kuery ae'ive va'e ma kova'e: Carsena, Setar, Admata, Társis, Meres, Marsena ha'e Memucã. Ha'e va'e sete-ve ma Pérsia ha'e Média pygua yvatekueve ikuai. Yvateve va'e vy huvixa renonde ikuai riae, openaa rupi oguapy avi 'rã okuapy.)

¹⁵ Ha'e gui ha'e kuery ma lei oña rami vy jogueroayvu okuapy mba'exa pa huvixa Assuero gua'yxy Vasti re ojapo aguã re, huvixa ayvu eunuco kuery omombe'u rã ndojapoi rire.

¹⁶ Ha'e gui ma Memucã aipoe'i huvixa ha'e yvatekueve va'e renonde py:

— Oreruvixa, ndera'yxy Vasti ma nderovai anho e'ŷ ojapo vai, ha'e javi regua yvatekueve ndee huvixa Assuero openaa ha'e javi rupi ikuai va'e rovai guive.

¹⁷ Mba'eta ndera'yxy oikoague regua ma kunhague ikuai va'e ha'e javi oendupa 'rā. "Huvixa Assuero oĩa py gua'yxy Vasti oenoĩ uka teĩ ndoui", 'ea rā oendu vy nomboeteveipa 'rā ome kuery.

¹⁸ Ange ma voi kunhague Pérsia ha'e Média pygua yvatekueve ma ndera'yxy oikoague oendupa vy ha'ekue rami ae ju 'rā ijayvu nerembiguai yvatekueve va'e pe. Ha'e rami rā heta 'rā ikuai nhomboetea rupi ve'ŷ, joupe ivaia rupi guive.

¹⁹ Ha'e gui ndee xeruvixa, rejou porā ri vy embopara uka peteĩ ayvu Pérsia ha'e Média pygua lei reguarā, ombovaipa pyrā e'ŷ. Ha'e va'e re toĩ ndee huvixa Assuero renonde py ta'yxy Vasti ndouvei aguã, ha'e ndera'yxy oikoague gui oipe'aa vy amboae kunha ha'eveve va'erā pe ome'ẽa aguã.

²⁰ Oreruvixa, ha'e va'e ayvu repenaa ha'e javi rupi remombe'u uka rā oikuaapa ramo pavē kunhague omboete 'rā okuapy ome, yvatekueve ha'e yvyīgueve guive — he'i.

²¹ Ha'e ramo ha'e va'e ayvu huvixa ojou porā, yvatekueve ikuai va'e avi. Ha'e rami vy ojapo Memucā ijayvuague rami.

²² Ha'e rami vy kuaxia huvixa ombopara uka ma vy omondouka openaa ha'e javi rupi. Peteĩ-teĩ yvy re ikuai va'e pe ombopara okuapy ha'e kuery oexa kuaa aguã rami, peteĩ-teĩ regua ayvu py ombopara, peteĩ-teĩ ava ngoo pygua kuery re ipo'aka aguã, ha'e guetarā kuery ayvu py ae ijayvu aguã.

¹ Ha'e va'e rire huvixa Assuero opoxya noenduvei ma vy ima'endu'a ju Vasti oikoague re, ha'e hexe ombopara uka va'ekue re.

² Ha'e ramo ixupe aipoe'i okuapy hembiguai kumumigue:

— Oreruvixa, toguerua neretonde kunhataīgue'i iporāgueve va'e anho.

³ Tove repenaa ha'e javi rupi tomoña ha'e nunga re opena va'erā, kunhataīgue'i iporāgueve va'e anho tomboatypa, Susā tetā py oupa aguā. Kunhague ro py ae toupa, nerembiguai eunuco Hegai kunhague ro rarōaty va'e opena aguā. Ha'e gui ma ha'e kuery pe tome'ē pire poā.

⁴ Ha'e gui oreruvixa, kunhataī rexa vy reayvvuva'e rei tema toī Vasti rekovia — he'i. Ha'e rami ijayvu ramo huvixa ojou porā. Ha'e vy ojapo uka ha'e rami ae.

⁵ Ha'e gui ma Susā tetā py oiko peteī ava judeu, Benjamim ramymino va'e, Mordecai hery va'e, Jair ra'y, ha'e Quis ra'y Simei ramymino va'e.

⁶ Ha'e va'e ma Jerusalém tetā gui escravo-rā ogueraapa pyre regua. Babilônia pygua huvixa Nabucodonosor ae ogueraa uka va'ekue Judá pygua huvixa Jeconias kuery reve.

⁷ Ha'e va'e ava ma omongakuaa otuty rajy ae'i Hadassa. Ha'e va'e ma Ester hery mboae, tuu ha'e ixv ve'ŷ va'e, kunhataī porā. Tuu ha'e ixv nda'ipovei ma ramo Mordecai ogueru va'ekue guajy ae'i rami omongakuaa aguā.

⁸ Ha'e gui ma huvixa ojapo uka va'ekue, ixuguigua lei omombe'upaa ramo heta omboaty heruvy kunhataīgue'i anho Susā tetā py oo yvateve va'e oī va'e py, Hegai opena aguā. Ha'e va'e kuery reve Ester voi herua huvixa ro py, kunhague re opena va'ety Hegai opena aguā py.

⁹ Ha'e va'e ma kunhataī oexa rā iporā vaipa, ojou porā aguā rami oiko guive. Ha'e ramo Ester pe ojapura pire

poã ogueru aguã, tembi'u ho'u va'erã guive. Hembiguairã ome'ẽ avi sete kunhataigue oiporavo pyre huvixa ro py ikuai va'e. Ha'e vy hembiguai kunhataigue reve ombaaxapa kunhague pegua opy ja'o ha'eveea py.

¹⁰ Ha'e va'e javé py Ester nomombe'u porãi teri hetarã kuery mavae regua pa ikuiaia, neĩ imongakuaare voi, Mordecai nomombe'u ukai rire.

¹¹ Ha'e gui ko'ẽ nhavõ Mordecai ou 'rã kunhague ikuiaia roka py, oikuua pota 'rã Ester oiko porã paa, ha'e mba'e pa hexe oiko 'rãa re.

¹² Ha'e gui doze jaxy re ma kunhague rekorã va'ekue oĩa rami vy openambaa ma rire ovaẽ ta ma ára peteĩ-teĩ kunhataĩ huvixa Assuero oĩa py ojexa uka aguã. (Mba'eta ha'e rami ae 'rã oiko kunhague onhemootyrõa ára ojeupitypa peve. Mboapy memea jaxy re azeite mirra guigua oikyty 'rã ojee, ha'e gui mboapy memea jaxy re ju amboae regua heakuã porã va'e ha'e kunhague pegua pire poã ae 'rã oikyty.)

¹³ Ha'e gui ma peteĩ-teĩ kunhataĩ ovaẽ 'rã huvixa oĩa py. Kunhague ikuiaia gui huvixa ro katy oo ta ramo peteĩ-teĩ ome'ea 'rã ogueraaxe va'e rei.

¹⁴ Ka'arukue ma oike 'rã opy, ha'e rã aje'ivekue ma oo ju 'rã amboae py kunhague ikuai aguã py. Ha'e va'e py huvixa rembiguai eunuco Saasgaz ju opena 'rã oikovy ta'yxy jevy kuery ikuai va'e re. Ha'e pygua kunhague neĩ peteïve ndouwei ju 'rã huvixa oĩa py, huvixa oipota vy hery rupi ae oenoĩ uka e'ŷa ja.

¹⁵ Ha'e gui ovaẽ ma Ester ju huvixa oĩa py oo aguã. Ha'e ma Mordecai ryvy Abail rajykue'i, guajy ae'i rami omongakuaa va'ekue. Ha'e gui oo ta ma vy ha'e ae ndojerurei mba'eve ogueraa va'erã re, huvixa rembiguai eunuco Hegai kunhague ro rarõaty va'e ogueraa uka va'e

anho ogueraa. Ha'e rami vy Ester rexaa kuery ha'e javi ojou porā rei okuapy.

¹⁶ Ha'e rami py huvixa Assuero ro py heraa Ester. Dez jaxytebete 'ea va'e py ogueraa, sete ma'etŷ re ma huvixa opena oiny jave.

¹⁷ Ha'e gui huvixa ma kunhague mboae gui oayvuve Ester. Kunhataīgue'i mboae huvixa oĩa py ou va'e ha'e javi gui ojou porāve, oayvuve ete. Ha'e rami vy inhakā re akā regua ouro guigua huvixa omoī reve Vasti rekovia ogueru gua'yxyrā.

¹⁸ Ha'e gui ma huvixa ojapo peteī ngaru tuvixa va'e ojeupegua kuery yvatekueve ha'e guembiguai kuery ha'e javi pe. Ester peguarā ae ojapo ngaru. Ha'e rami vy openaa ha'e javi rupi oikuaa uka pavē opytu'u aguā ára, ha'e huvixa ome'ẽxeal'i py mba'emo ome'ẽ rive pavē pe.

¹⁹ Ha'e gui mokoīguea kunhataīgue omboaty ukaa jave ma Mordecai oguapy oiny tenda huvixa ro rokē py.

²⁰ Ha'e jave py ma Mordecai ijayvuague rami vy Ester ndoikuua ukai teri guetarā kuery ha'e imongakuaare mava'e regua paa. Ester onhe'ẽ rendu teri oikovy Mordecai omongakuaa jave rami ae.

Huvixa ojukaxe okuapy rā Mordecai oikuaa ague

²¹ Ha'e va'e jave huvixa rokē py Mordecai oguapy oiny jave py ma huvixa Assuero rembiguai mokoī ikuai eunuco meme va'e, okē rarōa va'e regua Bigtā ha'e Teres hery va'e. Ha'e va'e kuery ma nguvixa pe ivai vaipa vy jogueroayvu ojuka aguā re.

²² Ha'e nunga Mordecai oikuaa vy omombe'u uka huvixa ra'yxy Ester pe. Ha'e rā Ester ma huvixa pe ju omombe'u uka Mordecai rery rupi.

²³ Ha'e ramo ha'e nunga re oikuaa potaa rā anhetēgua ra'e. Ha'e rā mokoīve ojyryvipy imoiny yvate. Ha'e nunga ma

huvixa renonde py omboparaa imoiny kuaxia mba'emo oikoague oña re.

3

Mordecai re Hamā nda'ija'eiague

¹ Ha'e nunga oikopa ma rire huvixa Assuero omboyvate Hamedata ra'y Hamā, Agague ramymino va'e. Ha'e vy oirū kuery yvatekueve ikuai va'e ha'e javi áry omoñ.

² Ha'e ramo huvixa rembiguai kuery hokē py ikuai va'e ha'e javi ma Hamā oaxa nhavō ojero'a vy guenapy'ā re 'rā ikuai henonde, ha'e rami ae huvixa ojapo uka rire. Ha'e rā Mordecai ma henonde ndojero'ai, guenapy'ā re noī guive.

³ Ha'e rami rā huvixa rembiguai kuery hokē py ikuai va'e aipoe'i okuapy Mordecai pe:

— Mba'e re tu huvixa ojapo ukaague rami e'ŷ reiko? — he'i okuapy.

⁴ Ko'ẽ nhavō ixupe ha'e rami ijayvu okuapy teĩ ndojapyx-aka potai. Ha'e ramo ha'e kuery omombe'u Hamā pe, oikuaaxe vy Mordecai pa ayvu py ipo'aka 'rāa. Mba'eta ha'e kuery pe onhemombe'u ma voi judeu oikoa.

⁵ Ha'e ramo Hamā oexa rā henonde py Mordecai ndojero'ai neĩ guenapy'ā re voi noī ramo ipoxy ete ixupe.

⁶ Ha'e rami avi onhembopy'a Mordecai ojuka uka aguā re, ha'e anho rive'ŷ guive ojukaxe. Mba'eta Hamā pe omombe'ua ma mava'e regua pa Mordecai oikoa. Ha'e rami vy Hamā onhembopy'a Mordecai retarā kuery judeu ikuai va'e ha'e javi ojuka uka aguā re, huvixa Assuero openaa ha'e javi rupi.

Hamā judeu kuery ojukapaxeague

⁷ Ha'e gui doze ma'etŷa re ma huvixa Assuero oī jave, jaxy ijypy'ia nisā 'epy va'e py ma Hamā guenonde py oexa uka xortea Pur 'epy py. Ko'ẽ nhavō guarā doze jaxy peve

ojapo. Ha'e rami vy oikuua jaxy adar 'epy va'e py ha'eve 'rāa.

⁸ Ha'e ramo Hamā aipoe'i huvixa Assuero pe:

— Xeruvixa, repenaa ha'e javi rupi pavē regua mbyte rupi peteī regua ikuai. Ha'e va'e kuery reko ma amboae regua ikuai va'e reko reve joo rami e'ŷ rei, lei remombe'u uka va'e rami e'ŷ guive ikuai. Ha'e va'e kuery ma nda'evei reja rive aguā.

⁹ Xeruvixa, ha'eve ri ramo embopara uka ha'e kuery ojukapaa aguā regua. Ha'e rami aguā ijukaarā kuery po py ame'ẽ 'rā trezentos e trinta mil quilos prata guigua, ndee huvixa mba'emo remoī porāaty pyguarā ae — he'i.

¹⁰ Ha'e ramo huvixa okuā gui kuā regua omboi vy ome'ẽ Hamedata ra'y Hamā, Agague ramymino ha'e judeu kuery rovaigua oiko va'e pe.*

¹¹ Ha'e vy aipoe'i ixupe:

— Ha'e va'e prata ma ndepo py ae topyta, judeu kuery ha'e rami ae avi. Ha'e kuery re ma reikuua rami ejapo.

Judeu kuery ojukapaa aguā huvixa oikuua ukaague

¹² Ha'e gui peteī jaxya ha'e treze araa py ma oenoīa huvixa rembiguai kuaxia mboparaa kuery. Ha'e ramo Hamā ijayvua ombopara okuapy huvixa kueryrā huvixave omoī va'ekue peguarā, ijyvy ha'e javi re opena va'e pe, peteī-teī regua yvatekueve pe guive. Peteī-teī regua ayvu py ombopara okuapy, peteī-teī regua oendu kuaa aguā rami. Huvixa Assuero rery rupi ae ombopara, huvixa kuā regua py omboja vy hery omoī guive.

¹³ Ha'e va'e kuaxia para omondouka ayvu reraaty kuery pe. Huvixa pegua yvy ha'e javi rupi omondouka judeu kuery omomba, ojukapa ha'e omokanhymba vyvoi aguā regua, kunumigue ha'e tujakue, kyrīgue'i ha'e kunhague

* ^{3:10} Kuā regua omboi vy Hamā pe ome'ẽ guery rupi ojapo uka aguā.

guive. Peteī ára pyve ojukapa aguā, doze jaxy adar 'epy va'e treze araa py, ha'e gui imba'e rei-reikue oipe'apa aguā guive.

¹⁴ Ha'e va'e ayvu oguerova avi peteī-teī yvy re lei ojapo pyre ogueroayvua aguā. Ha'e vy oguerova va'ekue ma ha'e javi regua pe omondouka, ha'e va'e ára pyguarā oiko katu pavē aguā.

¹⁵ Ha'e gui ma ayvu reraa kuery huvixa ojapo uka va'ekue oikuua vy oje'oi pojava. Ha'e ramo Susā tetā py omombe'ua oo yvateve va'e oī va'e rupi. Huvixa ha'e Hamā ma oy'u aguā py oguapy okuapy, ha'e rā Susā tetā rupi ma onhemondyipa rei okuapy.

4

Judeu kuery re Ester ojerure aguā re ijayvuague

¹ Ha'e nunga ha'e javi Mordecai oendu vy omondoro oao ha'e ajukue voxvaikue guigua py rive onhemonde, tanhimbu guive omoī ojee. Ha'e gui oē vy tetā rupi oiko-iko. Ipy'a vai nhendu rei ovy nda'evei etea oendu vy.

² Ha'e rami vy huvixa rokē peve'i ovaē, mba'eta huvixa rokē rupi ma avave rei nda'evei oike aguā voxvaikue guigua py onhemonde reve.

³ Ha'e gui yvy mboae-mboae rupi huvixa ijayvuague ha'e lei ojapo va'ekue omombe'ua rupi judeu kuery ipy'a vai ete okuapy, okaru e'ŷ re ikuai, ojae'o ha'e hexay vaipa reve. Mbovy rei e'ŷ tanhimbu áry onhenokuapy voxvaikue guigua py onhemonde reve.

⁴ Ha'e gui Ester oña py hembiguai kunhague ha'e eunuco kuery ou vy ixupe omombe'u okuapy Mordecai oikoa ha'e javi. Ha'e nunga huvixa ra'yxy oendu vy nda'evei etea oendu. Ha'e vy ajukue mboae omondouka Mordecai pe voxvaikue guigua ojegui omboi vy onhemonde aguā. Ha'e rami teī ha'e ma ndoipotai.

⁵ Ha'e ramo Ester oenoī huvixa rembiguai eunuco va'e regua Hataque hery va'e, Ester rembiguairā ju omboaxa va'ekue. Ha'e va'e ma Mordecai oña py Ester omondouka mba'e nunga pa oikoa oikuaa aguā.

⁶ Ha'e ramo tetā mbyte py Hataque oo Mordecai reve nhovaexī aguā huvixa rokē py oguapy oinya py.

⁷ Ixupe Mordecai omombe'upa hexe oiko va'ekue ha'e javi, huvixa pe Hamā prata ome'ẽ vy judeu kuery omomba aguā re ijayvuague guive omombe'u.

⁸ Ixupe ome'ẽ avi ipara oguerova pyre Susā tetā rupi ogueraa uka pyre, judeu kuery omombaa aguā regua, Ester pe hembiguai oexa uka vy oikuaa avi aguā, ha'e ju huvixa oña py oo vy omboaxy aguā re ojerure aguā, henonde py guetarā kuery re ojerure aguā.

⁹ Ester oña py Hataque ojevy vy omombe'upa Mordecai ijayvuague ha'e javi.

¹⁰ Ha'e ramo Hataque pe Ester ombovai vy aipoe'i uka Mordecai pe:

¹¹ — Ha'e rami avi huvixa rembiguai kuery ha'e javi, ha'e ijyvy ikuai va'e regua oikuaa pavē ava e'ŷ vy kunha teī ha'e ae rive opy ja'o py huvixa pe ojexa uka vy oike va'e rei, ha'e va'e peguarā peteī'i ayvu oī, ojukaa aguā, xapy'a rei ixupe huvixa opo pygua ouro guigua omokuave'ẽ e'ŷ vy, oikove aguā. Ha'e gui xee ma kova'e jaxy ha'e javi re huvixa naxerenoī teri oña py aa aguā — he'i.

¹² Ha'e rami Ester ijayvuague ma Mordecai pe ju omombe'ua.

¹³ Ha'e ramo imombe'ua kuery pe Mordecai ombovai Ester pe omombe'u aguā:

— Ha'e rami avi huvixa ro py ndee reiko va'eri exa'ã eme ndee anho'i reo jepe aguā re, ore judeu kuery mboae orejukapaa teī.

¹⁴ Mba'eta ha'e rami ete oiko taa ára rekyrirī ri ramo amboae henda gui ju 'rā oiko judeu kuery pytyvōarā ha'e heraa jepearā. Ha'e rā ndee ma rekany 'rā nderu ro pygua kuery ha'e javi reve. Xapy'a rei nhi'ā ha'e rami aguā ae nemoña raka'e huvixa ra'yxyrā — he'i uka.

¹⁵ Ha'e rami rā Ester ju aipoe'i uka Mordecai pe:

¹⁶ — Tereo ha'vy, emboatypa judeu kuery Susā tetā py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'ueme mba'eve, pey'ueme guive, ara py ha'e pyávy. Xee voi xerembiguai kuery reve rokaru e'ŷ re avi 'rā orekuai. Ha'e va'e rire ma aa 'rā huvixa oĩa py, lei oĩ va'e rovai teĩ ae ma. Xapy'a rei xejukaa aguā rami ri rā amano 'rā — he'i.

¹⁷ Ha'e ramo Mordecai oo vy ojapo Ester ojapo uka va'ekue ha'e javi.

5

Huvixa ha'e Hamā okaru aguā py Ester oenoīague

¹ Mboapy araa py Ester onhemoatyrō vy oao porāgueve py onhemonde. Ha'e vy oo vy huvixa ro roka py hi'aĩ, huvixa openaaty rexei. Ha'e rā huvixa ma guenda openaaty py oguapy oiny okẽ oĩ va'e yvy'iry.

² Ester oka py opyta ho'amy rā huvixa oexa vy oendu omovaěxea vy ixupe omokuave'ẽ po pygua ouro guigua. Ha'e rami rā Ester onhemboja vy po pygua apy re opoko.

³ Huvixa aipoe'i ixupe:

— Xera'xyx Ester, mba'e tu rerekko, mba'e nunga re ha'vy rejurerre ta? Mba'eta apenaa mbyte rupi peve teĩ xee ame'ẽ 'rā.

⁴ Ester ombovai:

— Xeruvixa, ndevy pe ha'eve ri ramo tereo ndee Hamā reve. Aŷ'i areko katupa ma ngaru ndevy — he'i.

⁵ Ha'e ramo huvixa aipoe'i:

— Pejapo ha'vy Hamā ojapura aguā rami, Ester oipota va'e rei rojapo aguā — he'i.

Ha'e gui huvixa ha'e Hamā ovaē ngaru tuvixa va'e Ester oguereko katu va'ekue py.

⁶ Vinho oy'u okuapya py huvixa oporandu Ester pe:

— Mba'e nunga re tu rejerure? Mba'eta xee ame'ē 'rā. Mba'e tu rejapo ukaxe? Apenaa mbyte rupi peve rejerure teī ojapoa 'rā.

⁷ Ha'e ramo Ester ombovai vy aipoe'i:

— Xee aipota va'e re ajerurea ma po rami:

⁸ Xeruvixa, xapy'a rei xemboaxy ramo, ha'e aipota va'e ojapoa aguā ndevy ha'eve ri ramo tove ko'ē ramo ju terevaē Hamā reve ngaru areko katu aguā py. Ha'e ramo mae ma rombovai 'rā, xeruvixa — he'i.

⁹ Ha'e va'e árave Hamā ojepe'a ov y ov y'aa onhenhandu reve. Ha'e rami teī huvixa rokē py Mordecai oguapy oinya py oexa rā henonde py nopu'āi neī nomboetei guive oiny ramo oendu Mordecai rovai ipoxy etea.

¹⁰ Ha'e rami teī Hamā ojejoko vy ngoo katy oo. Ha'e vy oirū kuery oenoī ukapa, gua'yxy Zeres guive.

¹¹ Ha'e kuery reve Hamā ijayvu iporiau e'ŷa re, gua'y kuery heta ikuaria re, opa mba'e py huvixa omboete ukaague re, ha'e huvixa rembiguai kuery yvatekueve mboae áry omboyvateveague re guive.

¹² Ha'e vy aipoe'ive ju:

— Huvixa ra'yxy Ester ae ma voi avave noenoī ngaru oguereko katuague py oo aguā, xee e'ŷ vy. Ha'e rami ae avi ko'ē rā guarā voi xerenoī ju huvixa reve aa aguā.

¹³ Ha'e rami teī ha'e nunga ha'e javi ma naxembovy'ai, huvixa rokē py judeu Mordecai oguapy oiny rā aexaa ja — he'i.

¹⁴ Ha'e ramo ixupe ta'yxy Zeres ha'e irū kuery ikuai va'e ha'e javi aipoe'i:

— Ejapo uka ha'vy peteī jojyryvipy rendarā, vinte e dois metros yvatea va'e ejapo. Ha'e gui ko'ē rā aje'ive'i reve huvixa pe aipo'ere Mordecai ojyryvipy aguā. Ha'e gui ma revy'a reve 'rā reo huvixa reve ngarua py — he'i. Ha'e rami ijayvua Hamā oendu vy ojou porā. Ha'e rami vy ojapo uka jojyryvipy rendarā.

6

Hamā pe Mordecai omboete ucaa ague

¹ Ha'e va'e pyávy ma huvixa ndokei re oiko. Ha'e rami vy kuaxia mba'emo oiko va'ekue-'ekue oĩa ogueru ruka ramo henonde py ogueroayvua.

² Ha'e va'e kuaxia para re ojou Bigtā ha'e Teres ojapo vaixea Mordecai oikuua ukaague. Mba'eta ha'e va'e mokoïve eunuco huvixa rokē rarōa kuery va'e regua ae huvixa Assuero ojukaxe teī va'ekue.

³ Ha'e gui ma huvixa oporandu:

— Mordecai ha'e rami ojapoague re mba'e nunga tu ixupe ojapo porāa raka'e omboete ucaa rupi?

Huvixa renonde hembiguai kuery ikuai va'e ombovai:

— Mba'eve rei ixupe ndojapo porāai teri — he'i okuapy.

⁴ Ha'e va'e jave py Hamā oike ae ma ra'e huvixa roka apy rupi, jojyryvipy rendarā Hamā ojapo uka va'ekue py huvixa pe ojerure aguā Mordecai ojyryvipy uka aguā. Ha'e ramo huvixa va'e oporandu:

— Mava'e tu oĩ oka py? — he'i.

⁵ Hembiguai kuery ombovai:

— Hamā rima oka py hi'aĩ — he'i. Ha'e ramo huvixa aipoe'i oike aguā.

⁶ Hamā oike ma ramo huvixa oporandu ixupe:

— Ava xee amboete ukaxe va'e pe ma mba'exa nda'u ha'eve 'rā ojapo porāa aguā? — he'i.

Ha'e rami rā Hamā ojeupe ae “Mava'e ha'vy oiko huvixa omboete uka vy oguerovy'ave 'rā, xee e'ŷ vy?” he'i.

⁷ Ha'e rami vy huvixa pe ombovai:

— Ava remboete ukaxe vy rejapo porāa va'e pe ma

⁸ toguerua ijaorā iporāve va'e ndee xeruvixa ae renhemondea va'ety regua, ha'e kavaju hi'áry riae ndee xeruvixa reikoaty va'e guive. Inhakā re ma tomoña akā regua ndee xeruvixa pegua ae.

⁹ Ndee xeruvixa rembiguai yvatekueve va'e ae tome'ẽ ijao ha'e kavaju ixupe, tomonhemonde avi ndee xeruvixa remboete ukaxe va'e. Ha'e gui ma kavaju áry togueraa tetā rupi tape ikuai va'e rupi, ha'e henonde rupi tomombe'u herekovy: “Ha'e rami ae ojapoa ava huvixa omboete ukaxe va'e pe”, te'i — he'i.

¹⁰ Ha'e ramo huvixa aipoe'i Hamā pe:

— Ejapura ke ha'vy. Ndeayvuague rami ae ejopy ao ha'e kavaju, ha'e huvixa rokē py judeu Mordecai oguapy oiny va'e pe ejapo. Nei peteĩ henda'i py ma voi ejapo e'ŷ eme ndeayvuague — he'i.

¹¹ Ha'e gui Hamā ma ao ha'e kavaju ogueraa vy omonhemonde Mordecai. Ha'e vy kavaju áry omoĩ vy tetā rupi ogueraa. Henonde rupi omombe'u herekovy:

— Ha'e rami ae ojapoa ava huvixa omboete ukaxe va'e pe — he'i ov.

¹² Ha'e va'e rire ma huvixa rokē py ju Mordecai ojevy. Ha'e rā Hamā ma oẽ vy onha ov yngoo katy. Nda'evei ete reve oakā onhovāmba ov.

¹³ Ha'e gui ma gua'yxy Zeres pe omombe'u oiko va'ekue ha'e javi, oirū kuery pe guive. Ha'e ramo irū kuery hi'aranduve va'e ta'yxy Zeres reve aipoe'i okuapy ixupe:

— Ha'e gui ma Mordecai renonde nemo'yvyi'ia ma. Judeu kuery regua oiko ramo nandepo'akai 'rā hexe. Ha'e

rami 'rāgue py anhetē henonde py nemo'yvy'i ete 'rā — he'i.

¹⁴ Hexeve ha'e kuery ijayvu teri reve ovaẽ okuapy huvixa rembiguai eunuco kuery. Ha'e vyve ogueraa pojava Hamā ngaru Ester oguereko katu va'ekue oiko aguā katy.

7

Hamā ojapoxea Ester omombe'u rire ojyryvipyague

¹ Ha'e gui ma huvixa oguerovaẽ Hamā gua'yxy Ester reve oy'u okuapy aguā py.

² Mokoīguea ma vinho oy'u okuapya py huvixa oporandu Ester pe:

— Xera'yxy Ester, mba'e nunga re ete tu rejerure ta? Ndevy pe xee ame'ẽ'rā. Mba'e ha'vy reipota? Xee ajapopa 'rā ndevy apenaa mbyte rupi peve rejerure tei.

³ Ha'e ramo ta'yxy Ester ombovai:

— Xeruvixa, xapy'a rei nerondenre py xemboaxy, ha'e ndevy pe ha'eve ri ramo eme'ẽ xee ajerurea xerekoverā re ae. Ha'e gui xee aipota va'e ma xeretarā kuery rejuka ukapa e'ỹ aguā.

⁴ Mba'eta ore kuery ma orevendepaa ma, xee ha'e xeretarā kuery reve, oremomba aguā, orejukapa ha'e oremokanhymba vyvoi aguā. Nhoembiguairā rive orevendea va'e rire xee akyirī'rāgue, mba'eta xeruvixa, ha'e rami va'e rire orerovaigua káuxa nda'evei 'rāgue romoangeko aguā — he'i.

⁵ Ha'e ramo huvixa Assuero oporanduve vy aipoe'i gua'yxy Ester pe:

— Mava'e tu ndeayvua va'e? Mamo tu oiko ha'e rami ete pendeapo aguā opy'a re oendu va'e?

⁶ Ester ombovai:

— Orerovaigua oremombaxe va'e ma peva'e mba'emo vai apoa Hamā — he'i.

Ha'e rami rā Hamā ma huvixa ha'e ta'yxy renonde py okyje reia anho oendu.

⁷ Huvixa ipoxy ete vy vinho oy'u oinya gui opu'ã vy oẽ ov yvotyty ngoka py oĩ va'e katy. Ha'e rā Hamā ma opy opyta huvixa ra'yxy Ester pe ojerure aguã guekoverā re, mba'eta oikuua huvixa ombopaga aguã re onhembopy'a maa.

⁸ Ha'e gui yvotyty ngoka py oĩ va'e gui huvixa oike ju ramo opy vinho oy'u okuapyague py, ha'e va'e jave tenda Ester oĩa áry Hamā ho'a ra'e. Ha'e nunga huvixa oexa vy aipoe'i:

— Peva'e ta'vy omoangeko teve ra'e xera'yxy Ester xerenonde, xero py ae?

Huvixa ha'e rami ijayvu ramove onhovāa Hamā rova.

⁹ Ha'e ramo peteĩ huvixa rembiguai eunuco regua Harbona hery va'e aipoe'i:

— Hamā ro katy'i ko hi'aĩ peteĩ jojyryvipy rendarā ojapo va'ekue vinte e dois metros yvatea va'e, ha'e va'e py huvixa reraa jepeare Mordecai ojyryvipy aguã ojapo uka va'ekue — he'i.

Ha'e ramo huvixa aipoe'i:

— Ha'e va'e py ae pejyryvipy Hamā — he'i.

¹⁰ Ha'e ramo Mordecai ojyryvipy aguã Hamā ojuka uka va'ekue py ae ojuka okuapy. Ha'e ramo mae ma huvixa noenduvei opoxyague.

Ngovaigua kuery re judeu kuery opu'ã aguã re ijayvuague

¹ Ha'e va'e árave judeu kuery rovaigua Hamā rogue huvixa Assuero ome'ẽ gua'yxy Ester pe. Mordecai avi oguerua huvixa renonde py, huvixa pe Ester hetarā ae oikoa omombe'u rire.

² Ha'e ramo huvixa okuā regua Hamā gui ojopy ju va'ekue omboi vy Mordecai pe ju ome'ẽ. Hamā rogue re opena va'erā ma Ester omoī Mordecai ae.

³ Huvixa renonde py Ester ijayvuve tema. Ha'e vy ipy rupi ojero'a oiny vy ojae'o reve ojerure oiny ombovaipa aguā Agague ramymino Hamā judeu kuery ojukapa aguā regua ombopara va'ekue.

⁴ Ha'e ramo Ester-a katy peteīgue ju huvixa omokuave'ẽ po pygua ouro guigua. Ha'e ramo Ester opu'ã ho'amy huvixa renonde py.

⁵ Ha'e vy aipoe'i ixupe:

— Xeruvixa, xapy'a rei ndevy pe ha'eve ramo, xemboaxy rendu ha'e ha'evea ramigua reikuua ramo, po rami aguā rejou porā ri ramo tomboparaa Hamedata ra'y Hamā Agague ramymino onhembopy'aague ombovaipaa aguā regua, mba'eta yvy repenaa ha'e javi rupi judeu kuery ikuai va'e omombaa aguā ombopara uka.

⁶ Mba'exa 'rā tu xee aexa ha'e rami ete mba'emo vai xeretarā kuery re oiko rā? Mba'exa 'rā tu aexa xeretarā kuery ojukapaa rā? — he'i.

⁷ Ha'e ramo huvixa Assuero aipoe'i gua'yxy Ester ha'e judeu regua Mordecai pe:

— Ha'e gui ma Hamā judeu kuery ojukapaxe ramo Ester pe xee amboaxa ma hogue, ajyryvipy uka guive imo'amy.

⁸ Aŷ ma pembopara avi ha'vy judeu kuery pe. Xee penderuvixa rery rupi pembopara peikuua rami ae. Ha'e gui pemboja avi xekuā regua py xerery remoī reve. Mba'eta huvixa rery rupi pembopara vy ikuā regua py pemboja rire imbovaipa rive pyrā e'ŷ ae optya — he'i.

⁹ Ha'e ramove oenoī huvixa rembiguai kuaxia mboparaaty kuery, mboapy jaxyā sivā 'epy va'e ha'e vinte e três araa py. Ha'e vy Mordecai ijayvua ha'e javi rami ombopara okuapy judeu kuery pe, opena va'e ha'e

huvixa kuery pe guive, ha'e yvy mboae Índia ha'e Etiópia rupi yvatekueve opena va'e kuery pe. Cento e vinte e sete yvy re opena va'e kuery pe ombopara peteĩ-teĩ regua ayvu py, peteĩ-teĩ regua oendu kuaa aguã rami. Judeu kuery pe voi ha'e rami ae avi ombopara ha'e kuery ayvu py, oendu kuaa aguã rami.

¹⁰ Huvixa Assuero rery rupi ombopara, ha'e huvixa kuã regua py ju omboja. Ha'e rami vy kuaxia para ogueraa uka ayvu reraaty kuery pe. Ha'e va'e kuery ma kavaju iporãgueve huvixa rymbarã imoingo pyre áry oje'oi.

¹¹ Ha'e va'e kuaxia re ma tetã nhavõ rupi judeu kuery ikuai va'e pe huvixa po rami ojapo uka, ono'õmba okuapy vy guekove oepya rupi joe opu'ã aguã. Ha'e kuery re, kyrígue e'ý vy kunhague re ha'e va'e yvy regua amongue tembiporu reve ou va'e rei tema judeu kuery ha'eve ojuka aguã. Omomba 'rã okanhymba vyvoi aguã rami, oipe'apa 'rã guive imba'e rei-reikue.

¹² Peteĩ ára pyve ha'e nunga ojapo 'rã okuapy yvy huvixa Assuero openaa ha'e javi rupi, doze jaxyaa adar 'epy va'e ha'e treze araa py.

¹³ Ha'e va'e kuaxia lei ombopara pyre oĩa ma yvy ikuai va'e ha'e javi rupi ogueroayvu pavẽ aguã. Ha'e javi regua kuery pe ogueraa, ha'e va'e ára pyguarã judeu kuery oiko katu aguã, ngovaigua kuery re opu'ã okuapy aguã.

¹⁴ Ha'e rami vy ayvu reraa kuery ma huvixa rymba kavaju áry ikuai vy oje'opia pojava. Huvixa ijayvuague oikuua vy inhakuãve tema oje'oivy. Susã tetã rupi voi oikuua ukapa.

¹⁵ Ha'e gui Mordecai ma huvixa renonde gui oẽ vy onhemonde ovy ao iporãve va'e yva rami hovy ha'e xiĩ rei va'e py. Inhakã re ma akã regua tuvixave va'e ouro guigua oĩ. Imanto-rã ma omoĩ ajukue xiĩ iperer'i'i va'e púrpura revuega. Ha'e ramo Susã tetã rupi ovy'apa okuapy.

¹⁶ Ha'e rami vy judeu kuery oendu okuapy ov'y'aa. Oguerovy'apa okuapy, ha'e kuery omboetepaa ramo.

¹⁷ Ha'e rami ae avi yvy ha'e javi ha'e tetā ikuai va'e rupi huvixa ayvu oikuua ukaa py rei tema judeu kuery ov'y'a vaipa okuapy, joguerovy'a, ngaru guive ojapo. Ha'e gui yvy regua kuery heta avi judeu rami onhemingo, judeu kuery gui okyjea anho oendu okuapy vy.

9

Ngovaigua kuery judeu kuery ojukapaague

¹ Ha'e gui doze jaxyia adar 'epy va'e ha'e treze araa py ma ojeupity ma huvixa ayvu ojapoa aguā. Ha'e rami vy judeu kuery re hovaigua kuery ipo'aka aguā re oarō okuapya ára ma oexa'äägue rami e'ŷ oiko, mba'eta judeu kuery ae ipo'aka okuapy nda'ija'ei va'e kuery re.

² Mba'eta huvixa Assuero openaa yvy ha'e javi rupi judeu kuery ikuai va'e guekoia tetā nhavō rupi ono'õmba okuapy imombaxeia kuery omomba aguā. Avave rei ndojoko kuaai, mba'eta yvy regua ha'e javi oendu okuapy okyje reia anho.

³ Ha'e gui yvy ha'e javi pygua yvatekueve, opena va'e ha'e huvixa kuery huvixave omoī va'ekue ha'e javi ma oipytyvō okuapy judeu kuery, Mordecai gui okyjepa vy.

⁴ Mba'eta Mordecai ma huvixa ro pygua kuery gui yvateve va'e oiko, yvy ha'e javi rupi oikuua guive. Ha'e rami vy ipo'akave ov'y tema 'rā.

⁵ Ha'e rami py judeu kuery oitypa ngovaigua kuery. Kyxe py ojukapa, omomba. Ngovaigua kuery oguerekoxea rami tema oguerekoko.

⁶ Susā tetā py voi judeu kuery ojuka vy omomba quinhen-tos avakue ikuai va'ekue.

⁷ Ha'e rami ae ojuka avi Parsandata, Dalfom, Aspata,

⁸ Porata, Adalia, Aridata,

⁹ Farmasta, Arisai, Aridai ha'e Vaizata.

¹⁰ Ha'e va'e kuery ma judeu rovaigua Hamedata ra'y Hamā ra'y kuery dez ikuai va'ekue. Ha'e rā ha'e kuery mba'e rei-reikue re ma ndopokoi.

¹¹ Ha'e va'e árave huvixa pe omombe'ua mbovy pa Susā tetā py ojukapa pyre.

¹² Ha'e ramo huvixa aipoe'i gua'yxy Ester pe:

— Susā tetā py judeu kuery ojuka vy omomba va'ekue ha'e javi vy ma je quinhentos avakue, ha'e Hamā ra'y kuery dez va'ekue ju. Ha'vy vvy mboae rupi ikuai va'e ma mbovy ju 'rā nda'u ojukaa? Ha'e rami vy mba'e re tu aŷ rejerureve ju? Mba'eta ha'e nunga ome'ëa 'rā ndevy. Mba'e nunga ju reipota ajapo? Ha'e nunga ojapoa 'rāe — he'i.

¹³ Ha'e ramo Ester ombovai:

— Ha'e rami rā xeruvixa, xapy'a rei rejou porā ramo tove Susā tetā py judeu kuery ikuai va'e ko'ë rā ju ta'ikuai aŷ guarā re ndeayvuague rami. Ha'e rā Hamā ra'y kuery dez ikuai va'ekue retekue ma tombovavaa imoiny jojryvipy a renderā ojapo pyre re — he'i.

¹⁴ Ha'e ramo huvixa aipoe'i ha'e rami ae tojapoa. Ha'e ramo Susā tetā py oikuua ukapaa. Ha'e gui Hamā ra'y kuery dez va'ekue retekue ombovavaa imoiny.

¹⁵ Ha'e gui jaxyu adar 'epy va'e ha'e catorze araa py ma judeu kuery Susā tetā py ikuai va'e ono'õmba okuapy vy trezentos avakue ju ojuka. Ha'e rā imba'e rei-reikue re ma ndopokoi.

Ngaru Purim 'epy va'e ojapo ypy okuapyague

¹⁶ Ha'e rami ae avi judeu kuery huvixa openaa vvy mboae rupi ikuai va'e voi ono'õmba okuapy vy guekove oepya rupi ikuai, ngovaigua kuery gui oo jepe aguã. Ha'e rami vy setenta e cinco mil ojuka ija'e e'ŷ va'ekue. Ha'e rā imba'e rei-reikue re ma ndopokoi.

¹⁷ Ha'e nunga ma jaxy adar 'epy va'e re oiko treze araa py. Ha'e gui catorze araa py ma optyu'upa okuapy. Ha'e va'e ára ojapo okuapy ngaru ov'y'a aguã.

¹⁸ Ha'e rã Susã tetã py judeu kuery ikuai va'e ma ha'e va'e jaxy re treze ha'e catorze araa py ju onhemboaty okuapy. Ha'e va'e kuery ma quinze araa py optyu'u vy ojapo ngaru ov'y'a aguã.

¹⁹ Ha'e rami ae avi judeu kuery tetã'i ikora e'ŷ va'e py ikuai va'e ma jaxy adar 'epy va'e re catorze araa py ae avi ojapo ngaru ov'y'a okuapy vy. Ha'e va'e ára ngaru ojapoa gui tembi'u ogueraa vy joupe-upe omboja'o okuapy.

²⁰ Ha'e nunga Mordecai ombopara vy kuaxia omon-douka huvixa Assuero openaa yvy ha'e javi rupi judeu kuery ikuai va'e pe, ha'e'i rupi ha'e mombyry rupi ikuai va'e pe guive.

²¹ Ha'e kuery rekorañ ombopara ma'etŷa nhavõ jaxy adar 'epy va'e re catorze araa py ngaru ojapo aguã quinze araa peve,

²² ha'e va'e ára py ae ngovaigua kuery gui oo jepepa rire. Ha'e va'e jaxy re ma iporiaupa okuapyague gui judeu kuery ov'y'aa rupi ju ikuai, ojae'opa reiague gui ngaru py ju ov'y'a okuapy. Ha'e nunga rupi ha'e oeja ov'y'a reve ngaru ojapo okuapy aguã, ha'e ngarua gui tembi'u ogueraa vy joupe-upe ome'ẽ aguã, iporiaukue'i pe guive.

²³ Ha'e ramo judeu kuery ojou porã okuapy guekorã va'ekue py ae ha'e rami ikuai aguã, Mordecai ojapo ukaague rami vy.

²⁴ Mba'eta ha'e va'e jave py Hamedata ra'y Hamã Agague ramymino judeu kuery rovaigua va'e onhembopy'a teĩ judeu kuery omomba aguã. Ha'e rami vy xorte Pur 'epy va'e oexa avi ombovaipa ha'e ojukapa aguã.

²⁵ Ha'e rami teĩ huvixa renonde py Ester oo ramo kuaxia ombopara vy ojapo Hamã judeu kuery ojukaxeal hexe ae ju

ojeapa aguã rami. Ha'e rami vy ojyryvipy uka, ta'y kuery guive.

²⁶ Ha'e nunga rupi ae ha'e va'e ára pe "Purim" 'ea, tery Pur va'e rami. Mba'eta ha'e va'e kuaxia para re oĩa rami ha'e nunga ha'e javi oiko rã ha'e kuery oexa okuapy.

²⁷ Ha'e rami rire judeu kuery guekorã ojou porã okuapy ha'e va'e mokoï ára ojeupity nhavõ ha'e rami ikuai aguã hexarai e'ŷ re, hamymino kuery ha'e onhemoirũ va'e kuery ha'e javi peguarã. Ha'e rami vy ojee omoõ ombopara pyre oĩa rami ikuai aguã, ma'etõa nhavõ oa'angaague ára ojeupity jave.

²⁸ Ha'e rami vy hamymino kuery ikuai jevy-jevy va'e peguarã ha'e va'e ára re ima'endu'a okuapy aguã, peteï-teï oo pygua kuery, yvy ha'e tetã ikuai va'e pygua ha'e javi. Ha'e rami vy Purim ára ojeupity nhavõ judeu ha'e hamymino kuery hexarai e'ŷ aguã raka'e rã peve.

²⁹ Ha'e gui ma Abail rajy huvixa ra'yxy Ester, judeu Mordecai reve teïgue ju ombopara kuaxia. Opo'akaa ha'e javi rupi ombopara Purim omombe'u ypy va'ekue omoõ atãve aguã.

³⁰ Opa rupi judeu kuery pe kuaxia para ogueraa uka cento e vinte e sete yvy huvixa Assuero openaa ha'e javi rupi. Ombovy'a aguã ombopara ombopy'a guaxua rupi.

³¹ Ha'e vy omoõ atãve aguã Purim oa'angaague ára py porã ikuai aguã judeu Mordecai, huvixa ra'yxy Ester reve ojapo ukaague rami, mba'eta ha'e kuery ae ranhe ikuai ha'e rami, ha'e gui guamymino kuery peguarã ju oeja, iporiau vy okaru e'ŷ re ikuaiague re ima'endu'a aguã.

³² Ha'e rami py Purim ára re marã rami pa ha'e kuery ikuai aguã Ester ae ojapo uka, kuaxia re ombopara vy.

¹ Ha'e nunga oikopa ma rire huvixa Assuero ojapo ha'e va'e yvy ha'e ye'ẽ rembe rupi ikuai va'e ha'e javi ixupe opaga aguã.

² Ha'e gui oĩve rei tema huvixa Assuero rekokue regua. Ha'e rami avi opo'akaa rupi mba'emo ovareve va'e ojapo va'ekue, ha'e Mordecai omboyvateveague ha'e javi noĩ 'rã teve kuaxia Média ha'e Pérsia pygua huvixa kuery rekokue oĩa re?

³ Mba'eta judeu Mordecai ma huvixa Assuero rembiguai yvateve va'e oiko. Judeu kuery voi omboete vaipa, hetarã kuery ha'e javi omboetepa okuapy, mba'eta ha'e kuery pe mba'emo porã ojapoa rupi anho oiko, ha'e kuery ikuai porã aguã re onhea'ã oikovy guive.

Nhanderuete ayvu iky'a e'ŷ va'e

New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 29 Jan 2022 from source files dated 29 Jan
2022
3309fa3b-7590-5ae9-b829-5df4ddfbf957